

## Franko

---

**Mi mayornan ta bendishoná ku seis yu hòمبر. Ami ta esun di sinku. Tin biaha mi ta sospechá ku mi mayornan lo a sigui purba te ora ku nan a realmente pèrdè speransa di haña un yu muhé. Kon ke sea, tabata hopi drùk na nos kas ku e seis mucha hòmbènan ei. Esei tabata kuminsá for di mainta trempañ kaba na momentu di desayuno. Den e tempu ei ainda tabatin bòter di glas pisá di un liter ku lechi aden. Di esakinan por lo ménos sinku tabata keda limpi limpi despues di kada desayuno. Kuater bòter tabata somentá den nos stoma sin bòm i tur mainta un di nos ta tumba minimal un bòter yen riba mesa di desayuno. Gluk, gluk, gluk, nunca mas lo mi no lubidá e zonido ei. Ni tampoko e gritu di mi mama ku ta eksplotá djis despues for di profundo di su alma tormentá tur mainta di nobo. Esaki no tabata yuda.**

Loke no tabata yuda tampoko, ta e echo ku mi mayornan tabatin e kustumber di papia franses ku otro si nan ker a papia riba un sierto tema ku nos komo mucha no tabatin mag di tende. Mi ta kòrda bon kla ku mi por a komprondé franses perfektamente bon (aloménos nan franses) tempu ku mi tabatin apénas sinku aña. Manera tur kos, esaki ta un kestion di motivashon. E ora ei bo ta siña hopi lihé. Si nan a gewon diskutí e tema delikado na hulandes ku otro, e ora ei probablemente nos lo no a ripará nèt nada. Nos lo no a bai paga tinu i skucha tòg.

Den sala di direktiva tambe, frankesa ta un tema fasinante. Transparensia, responsabilidad i integridat ta e tres pilánan di corporate governance. Tòg no ta semper transparensia ta neseseario òf deseá i tampoko no relashoná ku tur hende. E ta eksigí e sabiduria, eksperensia i kompreshon neseseario di tur dos banda pa por realisá e 'balancing act' ei korektamente komo direktiva i hunta di komisario. E bentananan di sala di direktiva ta 'one way screens'. Bo mester por wak afó hopi bon dor di nan, pero di pafó niun hende no tin mag di wak paden. 'What happens in the board room, stays in the board room'. Te ainda tin malkomprondementu riba esaki.

Esaki ta konta sigur pa komisarionan. Di pursori, ta reunion general di akshonista ta nombra nan. Mayoría akshonista (individual) tin nan propio agènda i ophetivonan. No ta semper esakinan mester kuadra kompletamente ku interes di empresa. E último akí ta e punto di orientashon sí di e komisario. Ke men esaki por forma un klèsh. Akshonistanan no tin derechi riba informashon tokante loke ta diskutí den sala di direktiva. Nan no tin derechi riba nótulo tampoko. Loke ta sigur ta ku nan no por duna ningun instrukshon (individual). Kòrtiku bisá, komo komisario bo ta mantené sekreto loke a diskutí den reunion i interkambiá na dokumento. Esaki ta konta tambe pa ku e akshonista ku a nombrabo. Na mes momentu, bo mester ta hopi habrí sí pa ku e perspektiva di futuro, strategia, kultura i e situashon finansiero ku e empresa ta pasa aden. Mester duna e frankesa akí konsientemente i di forma strukturá. Meskos ta konta pa e frankesa entre gerensia (direktiva) i hunta di kommisario. Nan mester ta semper honesto pa ku otro. Asina e honestidat ei disparsé, e konfiansa ta disparsé. Esaki, invariablemente ta final di e relashon. Esaki ta trese e empresa den peliger. P'esei honestidat i konfiansa no solamente ta obligashonnan moral, pero tambe profeshonal pa ku e organisashon. Den e relashon akí tambe esaki no ta nifiká ku bo (mester) por bisa tur kos numa. Pio ainda, den e relashon entre direktiva i hunta di komisario, bo mester yuíst regularmente hinka momentunan ku bo ta deliberá sin otro. E ora ei bo por papia den libertat i forma bo pensamentunan tokante asuntunan ku e otro no mester sa di dje (ainda). Despues bo ta kompartí ku otro sí kiko ta e loke a diskutí i kiko esaki ta nifiká pa e otro. Na un manera franko. I tur kos lo keda klaritu klaritu.

---



[Frank Kunneman](#)

VanEps Kunneman VanDoorne  
Attorney at law | Partner

T +5999 461 3400 ext. 254

E [kunneman@vandoorne.com](mailto:kunneman@vandoorne.com)

---